

09. juli 2020

UKA 2020/36

Inatsisartut Suleriaasianni § 33, imm.1 naapertorlugu aalajangiiffigisassatut siunnersuut imaattoq matumuuna saqqummiuppara:

Inatsisartut aalajangiiffigisassaattut siunnersuutigineqarpoq Naalakkersuisut nalunaajaatigisagaat, suliffeqarfiit aningaasaqarnikkut suliaqartut pisisartuminnut neqeroorutigilissagaat, isumaqatigiissutit allattariarsuutitalinnik imallit, pisisartup suliffeqarfiullu akunnerminni isumaqatigiissutaat, kalaallisut suliarineqartalissasut.

(Inatsisartunut ilaasortaq, Erik Jensen, Siumut)

Tungavilersuutit:

Namminersornerulernerput 2009-imi atuutilermat nutaamik pisoqarpoq, tassalu Kalaallit nunarsuarmioqatigiit inatsisaanni inuiattut akuerisaammata, periarfissinneqarlutalu naalagaffinngorsinnaasugut namminersortoq, kiisalu akisussaaffeqarfiit arlallit angerlaannissaannut periarfissaqalerluta. Namminersornerulernitta inatsisaa aamma kalaallisut oqaatsivut qaffatsitaapput pisortatigoortumik oqaasiulerlutik.

Oqaatsivut ullumikkut suli ukkatarissallugit pisariaqarpoq oqaatsivummi illersortariaqarmata aammalu oqaatsinut allanut naleqqiullugit inissisimanerput nalilersortariaqalerluni, minnerunngitsumik qallunaat oqaasii eqqarsaatigalugit. Kalaallisut oqaatsivut tungaviusumik eqqarsaatigalugu inuiaqatigiittut kinaassuserivagut aammalu Nunatsinni inunnik amerlanerpaanik atorineqarlutik. Oqaasiliortut naapertorlugit nalilersorpaat innuttaasut affai sinnerlugit kalaallisut oqaluttuusut aammalu qallunaatut pisinnaasoqarpiaranilu annikitsuinnarmik oqaluttoqarsinnaasoq.

Ullumikkut nalunngilarput suliffeqarfiit arlallit, soorlu assersuutigalugu aningaaseriviit, sillimmasiisarfiit, kukkuneruisartut, inatsisilerituut namminersortut sanaartormullu suliallit kalaallisut oqaasitsinnut annikitsuinnarmik atuisartut, neqeroorusiaallu isumaqatigiissutillu nassiusorneqartut tamatigut qallunaatut allassimasartut. Aningaasaqarnikkut oqartussaaffik suli Nunatsinnut angerlaanneqanngilaq. Tamannalu pitinnagu uanga isiginnittaasera malillugu pingaaruteqarpoq teknikkut aningaasaqarnikkullu ukkatarineqarsinnaasut siunnersuummi sammineqarluartariaqartut.

Anguniagara qulaaniit isigalugu tassaavoq siunnersuutigissallugu, kalaallisuinnaq oqaluttoqartillugu, innuttaalu aningaaserivimmi atorniarpat imaluunniit sillimmasersorniarpat, qallunaatuinnaq allassimasunik neqeroorfigineqassanngitsoq piumasaasut isumaqatigiissutillu eqqarsaatigalugit. Pissutsit taamaakkaluartut kalaallisut oqaatsivut Nunatsinni pisortatigoortumik atuupput, aammalu innuttaasut amerlanerussuteqarluartut kalaallisut oqaaseqarlutik. Tamannarpiaq pissutigierpiarlugu isumaqarpunga aningaasaqarnikkut pappiliat, innuttaasut aningaasaqarniarneranut pingaaruteqarluarsinnaasut inatsisitigut illersugaallutik kalaallisut saqqummiunneqarsinnaasariaqartut.

Naggataatigut nalunaarutigissavara, februarip ulluisa 24-iani 2020 Naalackersuisunut apeqquteqaasiorama matumani aalajangiiffigisassatut siunnersuutiginiagara tunngavilersorluarumallugu.

Akissutissara suli tassa martsip ulluisa 11-iani 2020 suli takkussimanngilaq, tassalu siunnersuuteqarnissatsinnut killiussaq qaangiutereerluni, tamannalu pissutigalugu Inatsisartuni ilaasortat innersuuppakka §37-imut apeqqummi 2020-44 akissut atuarluaqqullugu, neriulluarlungami tunngavigissagakku akissut takkussimassasoq, siunnersuut matumani pineqartoq Inatsisartunut saqqummiunneqalerpat.

Aningaasaqarnikkut allaffissornikkullu pisortanut kingunerisassai:

Aningaasatigut kingunerisassai taamatut misissuinermi suliaqarniaraanni A/C-ertut suliassamik 2,5 sippornaviangikkaa naatsorsuutigineqarpoq. Allaffissornikkut pisuussutit pisorta qarfirmi naliginnarmik ingerlatsinermit tiguinnarneqarsinnaapput, taamaalilluni aningaasatigut kinguneqartariaqassanani. Ilimagineqarsinnaavoq ilisimasallit avataanersut nalilersuineranik pissarsiniartoqarsinnaasoq, aningaasaativummi kingunerisassai nalilersorluartariaqarmata. Taamatut aningaasartuuteqartoqartariaqassappat naatsorsuutigineqarsinnaavoq sulisooreersunit suliarineqaannarsinnaasut.

Privatimik inuussutissarsiortunut aningaasaqarnikkut allaffissornikkullu kingunerisassai:

Nalunaajaatip suliarineqarnera immikkut ittumik privatimik inuussutissarsiortunut annertunerusumik kinguneqassanngilaq. Nalunaajaat tunngavigalugu pisussaaffinngussappat soorlulu taasitsinerup qulequtaani allaqqasutut taava aningaasaqarnikkut suliffiutillit nutserinermut aningaasartuuteqarnerunissaat naatsorsuutigineqarsinnaavoq isumaqatigiissutinut missiliussat pappialiullu allat atugassat eqqarsaatigalugit. Aningaasartuutigisassat qulakkiivillugit inississorneqarsinnaanngillat, taamaallaat naatsorsuutigineqarpoq aningaasartuutigineqarumaartussat pisisartunut tutsitaajumaartut. Tamannalu pissappat akiliutaasartut erniallu aningaasanik atornialernermi qaffassasut il. il.

Aningaasaqarnikkut allaffissornikkullu innuttaasunut kingunerisassai:

Nalunaajaatip suliarineqarnera innuttaasunut immikkut ittumik aningaasartuutaanaviannngilaq. Nalunaajaat tunngavigalugu pisussaaffinngussappat soorlulu taasitsinerup qulequtaani allaqqasutut taava aningaasaqarnikkut suliffiutillit nutserinermut aningaasartuuteqarnerunissaat naatsorsuutigineqarsinnaavoq isumaqatigiissutinut misiliussat pappialiullu allat atugassat eqqarsaatigalugit. Aningaasartuutigisassat qulakkiivillugit inississorneqarsinnaanngillat, taamaallaat naatsorsuutigineqarpoq aningaasartuutigineqarumaartussat pisisartunut tutsitaajumaartut. Tamannalu pissappat akiliutaasartut erniallu aningaasanik atornialernermi qaffassasut il. il.